



ATASSUT

UPA 2016/131

Siverth K. Heilmann

01.06. 2016

Nunatsinni sulisinnaasut tamarmik atorneqalernissaat anguniarlugu, minnerunngitsumillu kalaallinik atorfilinnik qaffakkiartortitsinissamik anguniagaqartumik, atorfilinnik pikkorissaanerup kalaallinut iluaqutaanerumik aqqqissuunneqarnissaanik oqallinnissamik siunnersuut. (Inatsisartuni ilaasorq Hans Enoksen, Partii Naleraq)

Siullermik inatsisartuni ilaasorta q Hans Enoksen, Partii Naleraq, apeqquteqaaat aallaavigalugu oqallisissianut qujanaq, imatullu ATASSUT-miit oqaaseqarfigissavarput.

Hans Enoksen ilumoorputit, ukiorpassuannortuni sulit tikisitanik sulisoqaratta, qularnanngitsumillu ilinniarsimassutsikkut sulit killeqarpallaartumik inissisimasoqarneranik naliliinerit ilumoortortaqqarpoq, taamaattorli nunaqavissunik (kalaallinik) atorfilinnik qaffakkiartortitsinissamik annertuumik kissaateqarnerput siuariartortoqqartorlu, Naalakkersuisut akissuteqaataanni takuneqarsinnaavoq.

Siunnersuuteqartoq tunngavilersornermini tikitai ilumoortortalerujussuupput, tassami siunissami ilinniartitaanikkut aningaasarsiornikkullu nukittunerumik inissisimalissagutta, aningaasat pikkorissarnernut ilinniartitaanernullu atorneqartarnerat, amerlanerpaat kalaallit sulisunut qaffakkiartornissaannullu atorneqarnerulernissaat siunertaralugu, atorfinitsitsisarnerullu pilerinarsarnerunissaanut naleqqussaanerunissaq avaqqunneqarsinnaannginnera ATASSUT-miit tunngaviatigit isumaqataavugut.

ATASSUT-miilli ilimavarput, atorfinitsitsinissamik qinnuteqartitsinerit tamanut saqqummiunneqartarmata, aammalu pinngitsaaliilluta qinnuteqartitsinissaannginnatta. Qinnuteqartut piginnaasaat malillugu atorfinitsitsisartunik toqqarneqartarput, taamaattorli aamma pisariaqarsinnaasarluni nutaamik qinnuteqartitsinissaaneq. Tikisitalli sulisussatut atorfinitsinneqartartut tikinneranniit ilinniartittakkagumik oqarneq assertugassaanngilluinnarpoq, tassuuna nunaqavissut sulisorineqaannarnissaanut ilisimasallu pigiinnarnissaanut ataqatigiinngitsumik sulisoqarnikkut politikkeqarneq oqareernitsitut naleqqussartariaqarpoq.

Suliffeqarfiit namminersortut namminerisaminnik atorfinitsisarnerat ATASSUT-miit ataqqivarput, nuannaarutigalugu oqaatigisinnaallugu, suliffeqarfinni namminersortuni aamma kalaallit nunaqavissut pikkorissullu sulisorineqartarnerat takussaaleriartuinnerat tapersersortuartariaqarparput.

Assersuutitut naggasiutigilaarlara, kalaalinnngorsaanermik oqalliseqartuarneq illuatungilerniarlugu, kommuunetoqatsinni pisortat tamavimmik sulisullu pikkoreqisut sulisoriinnarsinnaanerat angunikuugatsigu, aamma sulisut pikkorissaqqittuarnissaannut aningaasaliisarnitsigit, sulisut ataavartut ukiorpassuarnilu sulisoriinneqarnissaat politikikkut tapersersorneqarunik anguneqarsinnaanera ajornanngilaq. Taamanikkut kalaallimik kommune-ingenør-imik amigaateqarneq pissutigalugu, atasinnavimmik pisortaataitaqarpugut, massakkulli ilinniarsimasunik arlalissuarnik peqalernikuuvugut atorluarsinnaasatsinnik.

Nuna namminiilivinnissaminik innuttaasut taasisitsinneqarnerannik amerlanerusuteqarluartut akuersinikuunerat, siunissamilu tikisitanik isumalluuteqarnerujussuaq annikillissagutsigu,

pisariaqarluinnarpoq oqaluinnarata aamma ilisimasat pigiinnarnissaanut aqutissiuussinissatta pisariaqarluinnarnera ATASSUT-miit ersarissaqqissallugu. Sulisoqarniarnikkulli aningaasarsiornitta lu pisariaqartitsineq naapertorlugu unittuunnginnissaa, ilanngullu isumatuumillu aaqqissugaanissaa ATASSUT-ip pingaartippaa.

Taakkuupput apeqquteqaat aallaavigalugu oqallisissiamut ATASSUT-miit oqaatigiumasagut, siunnersuuteqartumullu qujaqqippugut, oqallisissiamut isummersoqqinnissamut periarfissinneqaratta.

Qujanaq,